

الفصل الثاني عشر

لقد ترددت كثيراً.. قبل كتابة ذلك الجزء لما فيه من مفارقات ووقائع وأحداث.. قد تؤدي بالقارئ إما.. إلى الموت ضحكاً! أو الحجز بمستشفى الأمراض العقلية جبراً! منضيعش الوقت ونخش في الموضوع.. وبالعرض وبالطول.. مع إني مشغول..؟

أكتوبر عام ١٩٧٠.. دخل جميع طلاب الشرطة المقبولين بالكلية.. ودي لها (قصة أخرى جانبية) مساء أحد أيام الجمعة في هذا الشهر(مولدي).. إلا.. أنا.. ليه يعكثنوا عليا..؟ سألت بعض الإخوة طلبة كلية الشرطة على محطة ترام سيدي جابر بالإسكندرية.. قبل توجههم للقطار.. أنكل.. أنكل.. نعم.. ممكن أسالك سؤال؟.. بكام؟ يا ساتر يا رب..! طلبة ولا مناشير..؟ هو ما فيش رحمة أو إنسانية.. يا أنكل أنا الباشمهندس سعيد سويلم.. (كنت قبلت في كلية الهندسة).. وأنا الباشويش عباس الخشن.. من أولها كده.. المعاملة مجففة وعايزة سنفرة..! طيب..

بسأل بس.. أنا قبلت بكلية الشرطة.. ممكن أبدل الشيك إن (check in) للكلية.. وآخره ثلاث أيام..؟ نعم يا خويا.. ليه..؟ يا أخي دي حاجة ساقعة أوي (ظروف مهيبة ومقندلة ومطينة اشيعليك أنت.. وأنت أنكل غريب وعجيب والله..!).. ظروف يطول شرحها والقطر حايبجي ياخدكم كلكم.. ومش حتلقوا..

تعرفوا .. بمناخيركم المندسة ديه .. طيب ممكن لغاية أسبوع ..
واحد ثاني قال: اسبوعين .. أنا .. مين يزود .. هرج لغاية ما الكلية
ترفدك .. وتعملك شيك أوت ..؟ أنا .. والقطر يفوتكم ويصفر
لكم ..؟ طبطبت على نفسي .. وبعدين لميت ظروفي ونفسي .. وتوكلت
على الله لوحدي بعد أربع أيام .. وكانت رسوم الكلية ٦٧ جنيه
+ ٢٧ جنيهًا قيمة شنطة مستلزمات وملابس الإقامة بالكلية من
الجمعية الاستهلاكية التعاونية مساكن الشرطة بالعباسية بجوار
الكلية وبها المحتويات التالية:

(ملابس داخلية ملونة لأسبوع كل يوم لون + فرش سنان
شُحار ومعجون + فرش سباط لتميع الجزمة وورنيش ودوكو +
وسبداج ومحار وبلانكو رومي + بيجامة كستور واخرى تيل ناديه
+ روب دي شمبر لاستقبال الضيوف في طرقة العنبر + عدد اثنين
منديل تيل عشان العطس في البرد بدل المسح في الكُم + سلبس تاتا
للرياضة أبيض مش على مقاسك + كوفية عند اللزوم .. للانتحار
+ عدد اثنين شراب باستك للسمع أي حد يرخم عليك ..! نحاسة
وبراسو لتلميع الوجه والزراير النحاسية والباغة وقفا زميلك
العزيرالي بجوارك بالسريير + قلشين لزوم ربط الحمار .. أقصد
الحصان برجلك عشان مايرفسكش ..! + ماكينة حلاقة ودسته
أمواس لقطع الشرايين مع الشعر عند الاضطهاد والإحباط ..!)
الإجمالي ٩٧ جنيهه يبطح جنيهه ..

خدوا بالكم قوي من اللي جاي.. وصلت للبوابة.. لقيت المدفعين.. من أولها كده بيدحولنا القطة ولا إيه.. دنيا.. اقتربت بكل ثقة واقتدار.. كأنني عمر المختار.. وبس قلت.. احم.. احم.. اتفتح الباب الكبير العالي.. لذو المقام العالي.. سعيد باشا سويلم.. وبكل ألاطة.. وشايل الشنطة.. فين الرسيشن والمرافقين..! واحد على الشمال وواحد على اليمين.. أهلا.. أهلا بالغالي والكبير.. سعادتك كنا لمعاليك مستيين..؟ كل ده وأنا حاسس إني مش مستريح.. يمكن عشان مكان وجو جديد..! .. سعادتك النهارده الاتنين وكنا منتظرين وصول معاليك الجمعة اللي فاتت.. اللي فاتت ماتت.. وأنا بعث لكم تلغرافات وقلت فيه الميعاد.. وحاسود عيشتكم لو كنتم لغيتوا الحجز بالسويتات..! .. تؤمر يا باشا.. كل شيء تمام.. وسعادتك اتفضل المخزن.. أقصد الصالون عشان استلام المهمات.. بسرعة عشان أنا جاي من السفر وعايز أريح شوية.. يا سلام إحنا موجودين لراحة سعادتك.. وسعادتك..! الناس دول مؤدبين وحاكتب لقيادتهم شهادات شكر وتقدير.. جابوا بطاينة رصاصي وفردوها قدامي وحطوها.. وعليها جبال وأطنان من الملابس كأنني في سوق الكانتو أو زنقة الستات بالإسكندرية.. وشالوها.. وبدأوا في تجربة وقياس الملابس عليا.. قلتهم: فين الفيتينج روم.. (غرفة تبديل وتغيير الملابس..؟) فهموني غلط وودوني الحمام.. إيه الذكاء ده..!

أنا شاكك إنهم عساكر بس مؤدبين وموانسني.. ومثابرين.. وعليها صابرين..؟.. وشوية واحد منهم اسمه عبد الستار قعدني على فوتيه في الصالون (المخزن) على الرصيف ومسك رجلي اليمين وقال للي معاه واسمه حمدي.. ياله.. لبسوني الجزمة البيادة للقياس وكل شوية أرفضها وأرميها في وشهم.. وقول لهم مش مريحاني..! وأخيراً قمت بالبيادة مقاسي.. وهما ورايا بالبطانية المليئة بالمهمات تأكد حدسي.. اللي عمره ما خابشي عساكر.. عساكر مفيش كلام.. طلعت من جيبي الشمال نص جنيه..!

(وَلَا تَبْخُسُوا النَّاسَ أَشْيَاءَهُمْ) يلاه بقى بشرقوا نفسكم.. مبلمين..! طماعين.. طيب خدوا كمان نص جنيه تاني.. وده آخري..! وبدأت فوهة وبركان الندالة.. يا شويش جوهري.. يا شويش ممدوح.. ياله ياله.. إيه شغل العيال ده.. نادوا كل العساكر شوف حاعمل فيكم كلكم إيه.. يا ابني أنت وهو أنا كمان أربع سنين حابقي ضابط عليكم..! وأحاكمكم كلكم على الحركات الخايبة ديه..! وعينكم ما تشوف إلا كل خير..! ويا رب وما يحكموش عليكم باللي شفته وحصلي.. صريخ وصوات.. ودخان ورماد.. وشخط ونطر.. وزغرد ووجز.. لا دول زودوها قوي ولا بد من محاكمتهم.. رميت الشنطة في وشهم وجريت على ضابط نقيب بالطريقة عيونه خضر وشعره أصفر وكلمته بالانجليزي نزل الهلب. قصدي هلب مي.. من باد جنود..؟ قاللي

أنا أسبيك دومنيك.. واياه اللي حصل ليك؟.. قلت: العساكر دول
عايزين يتربوا عند الشاويش عبد ربه.. أخذني على جنب وقال
الحقيقة المرة.. دول صف ضباطك الأعلى.. وطلبة متفوقين..
في سنه رابعة.. وحايقوا ضباط آخر السنة دي.. وحايسووك
ويعدلوك ويدلقوك في الحلة.. وكل أيامك حتبقى مُوره..! مين
دول طلعا.. أعز الإخوة وأكرمهم.. وكانوا ماسكين نفسهم من
الضحك عليا.. ووروني أيام كلها ألوان أخفها وأرحمها الأسود..!
الحبيب الغالي والخلوق الشاويش عبد الستار.. وهو اللي متولي
سلقي بالحلة فوق النار.. والشويش حمدي سعد رياض (تسعه
استعد).. والشويش جوهرى (سته استعد).. والشاويش ممدوح أبو
العلا.. مركبني السلاحليك وأنزل بالبراشوت.. وكل شوية أغير
الشيولت..!.. والشاويش مدحت ثابت الكاشف.. مخليني طول
السنة لوحدي أزق في جدار العنبر عشان أزحزه وأوسعه..؟..
أما الضابط الخواجة فهو ضابط الفصيلا النقيب عمر السويسي.
رحم الله الراحلين وبارك وأمد في عمر الباقيين.. أخذوني كلهم
كأنهم لقوا لعبة.. أو لقيه.. وأدخلوني لقائد السرية (١٣) الرائد
محمود سامي شهدي.. خير.. إيه الكائن ده. ده طالب جاي
من الأقاليم (الإسكندرية) وشايف نفسه شويه.. وبيتحايل علينا
عشان.. يحضر نفسه بعد غياب..؟ جبت الفلوس؟ أيوة يا فندم
عطيتهم كل واحد نص جنيه عملوا هيصه وما اخدهوش..!..
بكلمك على رسوم الكلية..!

نعم.. آه.. افكرت.. ممكن سيادتك موس..! ! حاتهرج يا
فندي..؟ طب.. بلاش مطواة!.. أنت كنت بتشتغل إيه قبل ما
تيجي الكلية..؟ طالب في العباسية الثانوية بالإسكندرية ودي
مدرسة المتفوقين يا فندم.. عايز الموس والمطواة ليه.. عشان أدفع
المصاريف..؟ .. حاتغزنا ولا إيه.. ليه.. عشان اللي عملوه معاك؟
لا يا فندم أنا قلبي طيب وحنين وبأنسي الأسية.. الموس ليه يا
فندي وخلصني؟ واللّه يا فندم عشان أدفع الرسوم.. امسكوه..
وكتفوه..!

طب حاجيها إزاي يا فندم.. حلقوا عليه وحاوطوه.. خد
الموس.. رححت بالراحة وبهدوء مسكت الموس باليمين وهما بيبصوا
ليا وخايفين..! وماسك طرف جيب البنطلون الخارجي اليمين..
وقعدت أقطع فتله فتلة من خياطة فتحة جيب اليمين.. وأخيراً
بعد ربع ساعة طلعت من عقر وعمق جيب الرسوم.. وشاكوش
وقدوم.. ليه عملت كده..؟ عشان يا فندم ده شقى عمري
وجيراني ومديون.. ودي أمانة لازم أوصلها لسيادتكم بالكامل..!
وولاد الحرام في القطر كتير..! وعايز ربنا يسترها معايا وأبقى
في المضمون.. كده طب حموه..! ودوني الشويشية للحلاق.. (مع
إن كان إجازة الحلاقين يوم الاثنين) وحلقت زيرو.. وقعدت أعيط
على شعري الحرير اللي بيتغنى بيه عبد الحليم.. وشوي وحضر
باقي زملائي من المحاضرات والغذاء ولقيتهم جميعاً يول براينر

وحسام حسن.. وللبروكة قلعين.. وفي أول يوم وكان لبسنا جميعا
كالفار المسلوق.. شورت وتيشرت (قميص) وباريه.. وأنا بجوار
مبنى صالة الملاكمة المفتوحة كالبسارية الداخلة..! قلت ياه هل
سأتذكر عندما أكبر، وربنا يوفقنا جميعاً كدفعة ٧٤ كيف بدأنا
وكيف كنا وكيف أصبحنا بفضل وعون وتوفيق الله، ومن منا حقق
ذاته وأحلامه.. ومن منا أرضى ربه وخاصة في خلقه..؟ ومن منا
راحل ومن منا آخر الباقيين.. والبقاء لله رب العالمين.

ويتساقط الأحباب كورق الشجر.. ونكاد نكون في صحراء
جرداء.. من الأصدقاء والأعزاء الذين يرحلون الواحد تلو الآخر..
إلى أن تلقى الواحد الدائم الحنان.. لكم ولنا جميعا الدعوات
بحسن الختام.. ورضا الله علينا.. الرحمن الغفار الرحيم..
ونستودعكم الله.. آمين.

